

李商隐全集
李贺集

出版社

李商隐全集

（唐）李商隐 著

诗集卷一

编年诗

韩 碑

元和天子神武姿，彼何人哉轩与羲。誓将上雪列圣耻，坐法宫中朝四夷。淮西有贼五十载，封狼生豳豳生罴。不据山河据平地，长戈利矛日可麾。帝得圣相相曰度，原注：《晏子春秋》：仲尼圣相。贼斫不死神扶持。腰悬相印作都统，阴风惨澹天王旗。愬、武、古、通作牙爪，仪曹外郎载笔随。行军司马智且勇，十四万众犹虎貔。入蔡缚贼献太庙，功无与让恩不訾。帝曰汝度功第一，汝从事愈宜为辞。愈拜稽首蹈且舞，金石刻画臣能为。古者世称大手笔，此事不系于职司。当仁自古有不让，言讫屡颌天子颐。公退斋戒坐小阁，濡染大笔何淋漓。点窜《尧典》、《舜典》字，涂改《清庙》、《生民》诗。文成破体书在纸，清晨再拜铺丹墀。表曰臣愈昧死上，咏神圣功书之碑。碑高三丈字如手，负以灵鳌蟠以螭。句奇语重喻者少，谗之天子言其私。长绳百尺拽碑倒，粗砂大石相磨治。公之斯文若元气，先时已入人肝脾。汤盘孔鼎有述作，今无其器存其词。呜呼圣皇及圣相，相与烜赫流淳



熙。公之斯文不示后，曷与三五相攀追？愿书万本诵万过，
口角流沫右手胝。传之七十有二代，以为封禅玉检明堂基。

富平少侯

七国三边未到忧，十三身袭富平侯。不收金弹抛林外，
却惜银床在井头。彩树转灯珠错落，绣檀回枕玉雕锼。当关
不报侵晨客，新得佳人字莫愁。

日 高

镀轂故锦縠轻拖，玉鈎不动便门锁。水精眠梦是何人，
栏药日高红髮蠹。飞香上云春诉天，云梯十二门九关。轻身
灭影何可望，粉蛾帖死屏风上。

陈 后 宫

玄武开新苑，龙舟宴幸频。渚莲参法驾，沙鸟犯勾陈。
寿献金茎露，歌翻《玉树》尘。夜来江令醉，别诏宿临春。

陈 后 宫

茂苑城如画，阊门瓦欲流。还依水光殿，更起月华楼。
侵夜鸾开镜，迎冬雉献裘。从臣皆半醉，天子正无愁。



览 古

莫恃金汤忽太平，草间霜露古今情。空糊□壤真何益，
欲举黄旗竟未成。长乐瓦飞随水逝，景阳钟堕失天明。回头
一吊箕山客，始信逃尧不为名。

隋 师 东

东征日调万黄金，几竭中原买斗心。军令未闻诛马谡，
捷书惟是报孙歆。原注：平吴之役，上言得歆。吴平，孙尚在。但须□□
巢阿阁，岂假鸱鸢在泮林。可惜前朝玄菟郡，积骸成莽阵云
深。

谢 书

微意何曾有一毫，空携笔砚奉《龙韬》。自蒙半夜传衣
后，不羨王祥得佩刀。

无 题

八岁偷照镜，长眉已能画。十岁去踏青，芙蓉作裙衩。
十二学弹箏，银甲不曾卸。十四藏六亲，悬知犹未嫁。十五
泣春风，背面秋千下。



失 题

幽人不倦赏，秋暑贵招邀。竹碧转怅望，池清犹寂寥。
露花终葳湿，风蝶强娇饶。此地如携手，兼君不自聊。

天平公座中呈令狐令公

罢执霓旌上醺坛，慢妆娇树水晶盘。更深欲诉蛾眉敛，
衣薄临醒玉艳寒。白足禅僧思败道，青袍御史拟休官。虽然
同是将军客，不敢公然子细看。

牡 丹

锦帟初卷卫夫人，原注：《典略》云：夫子见南子在锦帟之中。绣被犹
堆越鄂君。垂手乱翻雕玉佩，折腰争舞郁金香。石家蜡烛何
曾剪，苟令香炉可待熏。我是梦中传彩笔，欲书花叶寄朝
云。

初食笋呈座中

嫩箨香苞初出林，於陵论价重如金。皇都陆海应无数，
忍剪凌云一寸心？



海 上

石桥东望海连天，徐福空来不得仙。直遣麻姑与搔背，可能留命待桑田？

赠赵协律皙

俱识孙公与谢公，二年歌哭处还同。已叨邹、马声华末，更共刘、卢族望通。自注：愚与赵俱出今吏部相公门下，又同为故尚书安平公所知，复皆是安平公表侄。南省恩深宾馆在，东山事往妓楼空。不堪岁暮相逢地，我欲西征君又东。

赠宇文中丞

欲构中天正急材，自缘烟水恋平台。人间只有嵇延祖，最望山公启事来。自注：公盛叹亡友张君，故有此句。

安平公诗

自注：故赠尚书讳氏。

丈人博陵王名家，怜我总角称才华。华州留语晓至暮，高声喝吏放两衙。明朝骑马出城外，送我习业南山阿。仲子延岳年十六，面如白玉欹乌纱。其弟炳章犹两丱，瑶林琼树含奇花。陈留阮家诸姓秀，迺迺出拜何骅罗。府中从事杜与



李，麟角虎翅相过摩。清词孤韵有歌响，击触钟磬鸣环珂。三月石堤冻消释，东风开花满阳坡。时禽得伴戏新木，其声尖咽如鸣梭。公时载酒领从事，踊跃鞍马来相过。仰看楼殿撮清汉，坐视世界如恒沙。面热脚掉互登陟，青云表柱白云崖。一百八句在贝叶，三十三天长雨花。长者子来辄献盖，辟支佛去空留靴。公时受诏镇东鲁，遣我草奏随车牙。顾我下笔即千字，疑我读书倾五车。呜呼大贤苦不寿，时世方士无灵砂。五月至止六月病，遽颓泰山惊逝波。明年徒步吊京国，宅破子毁哀如何。西风冲户卷素帐，霄光斜照旧燕窠。古人常叹知己少，况我沦贱艰虞多。如公之德世一二，岂得无泪如黄河。沥胆咒愿天有眼，君子之泽方滂沱。

过故崔兗海宅与崔明秀才话旧因 寄旧僚杜赵李三掾

绛帐恩如昨，乌衣事莫寻。诸生空会葬，旧掾已华簪。
共入留宾驿，俱分市骏金。莫凭无鬼论，终负托孤心。

宿骆氏亭寄怀崔雍崔衮

竹坞无尘水槛清，相思迢递隔重城。秋阴不散霜飞晚，
留得枯荷听雨声。



公 子

外戚封侯自有恩，平明通籍九华门。金唐公主年应小，
二十君王未许婚。

东 还

自有仙才自不知，十年长梦采华芝。秋风动地黄云暮，
归去嵩阳寻旧师。

夕 阳 楼

自注：在荥阳。是所知今遂宁萧侍郎牧荥阳日作矣。

花明柳暗绕天愁，上尽重城更上楼。欲问孤鸿向何处，
不知身世自悠悠。

有感二首

自注：乙卯年有感，丙辰年诗成。

九服归元化，三灵叶睿图。如何本初辈，自取屈骜诛？
有甚当车泣，因劳下殿趋。何成奏云物，直是灭萑苻。证逮
符书密，辞连性命俱。竟缘尊汉相，不早辨胡雏。鬼篆分朝
部，军烽照上都。敢云堪恸哭，未免怨洪炉。

丹陛犹敷奏，彤庭钺战争。临危对卢植，自注：是晚独召故相彭阳公入。始悔用庞萌。御仗收前殿，凶徒剧背城。苍黄五色



棒，掩遏一阳生。古有清君侧，今非乏老成。素心虽未易，此举太无名。谁瞑衔冤目，宁吞欲绝声？近闻开寿宴，不废用《咸》《英》。

重有感

玉帐牙旗得上游，安危须共主君忧。窦融表已来关右，陶侃军宜次石头。岂有蛟龙愁失水，更无鹰隼与高秋。昼号夜哭兼幽显，早晚星关雪涕收。

故番禺侯以赃罪致不辜事觉母者他日过其门

饮鸩非君命，兹身亦厚亡。江陵从种橘，交广合投香。不见千金子，空馀数仞墙。杀人须显戮，谁举汉三章？

哭遂州萧侍郎二十四韵

遥作时多难，先令祸有源。初惊逐客议，旋骇党人冤。密侍荣方入，司刑望愈尊。皆因优诏用，实有谏书存。苦雾三辰没，穷阴四塞昏。虎威狐更假，隼击鸟逾喧。徒欲心存阙，终遭耳属垣。遗音和蜀魄，易箠对巴猿。有女悲初寡，无男泣过门。自注：公止裴氏一女，结褵之明年，又丧良人。朝争屈原草，庙馁若敖魂。迴阁伤神峻，长江极望翻。青云宁寄意，白骨始沾恩。早岁思东阁，为邦属故园。自注：余初谒于郑舍。登舟惭郭泰，解榻愧陈蕃。分以忘年契，情犹锡类敦。公先真帝



子，我系本王孙。啸傲张高盖，从容接短辕。秋吟小山桂，春醉后堂萱。自叹离通籍，何尝忘叫阍。不成穿圉入，终拟上书论。多士还鱼贯，云谁正骏奔？暂能诛倏忽，长与问乾坤。蚁漏三泉路，□啼百草根。始知同泰讲，微福是虚言。

五 松 驿

独下长亭念《过秦》，五松不见见舆薪。只应既斩斯、高后，寻被樵人用斧斤。

令狐八拾遗_见招送裴十四归华州

二十中郎未足稀，骊驹先自有光辉。兰亭宴罢方回去，雪夜诗成道韞归。汉苑风烟催客梦，云台洞穴接郊扉。嗟余久抱临邛渴，便欲因君问钓矶。

和友人戏赠二首

东望花楼会不同，西来双燕信休通。仙人掌冷三霄露，玉女窗虚五夜风。翠袖自随回雪转，烛房寻类外庭空。殷勤莫使清香透，牢合金鱼锁桂丛。

迢递青门有几关？柳梢楼角见南山。明珠可贯须为珮，白璧堪裁且作环。子夜休歌团扇掩，新正未破剪刀闲。猿啼鹤怨终年事，未抵熏炉一夕间。



题二首后重有戏赠任秀才

一丈红蔷拥翠筠，罗窗不识绕街尘。峡中寻觅长逢雨，
月里依稀更有人。虚为错刀留远客，枉缘书札损文鳞。
遥知小阁还斜照，羨杀乌龙卧锦茵。

李肱所遗画松诗书两纸得四十一韵

万草已凉露，开图披古松。青山遍沧海，此树生何峰？
孤根邈无倚，直立撑鸿蒙。端如君子身，挺若壮士胸。樛枝
势夭矫，忽欲蟠拏空。又如惊螭走，默与奔云逢。孙枝擢细
叶，旖旎狐裘茸。邹颠蓍发软，丽原注：如字。姬眉黛浓。视
久眩目睛，倏忽变辉容。竦削正稠直，婀娜旋逶迤。原注：《尔
雅》：粤峯，掣曳也。又如洞房冷，翠被张穹笼。亦若暨罗女，平
旦妆颜容。细疑袭气母，猛若争神功。燕雀固寂寂，雾露常
冲冲。重兰愧伤暮，碧竹惭空中。可集呈瑞凤，堪藏行雨
龙。淮山桂偃蹇，蜀郡桑重童。枝条亮眇脆，灵气何由同。
昔闻咸阳帝，近说嵇山侬。或著佳人号，或以大夫封。终南
与清都，烟雨遥相通。安知夜夜意，不起西南风？美人昔清
兴，重之由月钟。宝笏十八九，香缙千万重。一旦鬼瞰室，
稠叠张縠罩。赤羽中要害，是非皆匆匆。生如碧海月，死践
霜郊蓬。平生握中玩，散失随奴僮。我闻照妖镜，及与神剑
锋。寓身会有地，不为凡物蒙。伊人秉兹图，顾盼择所从。
而我何为者，开怀捧灵踪。报以漆鸣琴，悬之真珠栊。是时
方暑夏，座内若严冬。忆昔谢四骑，学仙玉阳东。千株尽若



此，路入琼瑶宫。口咏《玄云歌》，手把金芙蓉。浓蕙深霓袖，色映琅玕中。悲哉堕世网，去之若遗弓。形魄天坛上，海日高瞳瞳。终期紫鸾归，持寄扶桑翁。

送从翁从东川弘农尚书幕

大镇初更帅，嘉宾素见邀。使车无远近，归路更烟霄。稳放骅骝步，高安翡翠巢。御风知有在，去国肯无聊。早忝诸孙末，俱从小隐招。心悬紫云阁，梦断赤城标。素女悲清瑟，秦娥弄碧箫。山连玄圃近，水接绛河遥。岂意闻周铎，翻然慕舜《韶》。皆辞乔木去，远逐断蓬飘。薄俗谁其激？斯民已甚忼。鸾凰期一举，燕雀不相饶。敢共颓波远，因之内火烧。是非过别梦，时节惨惊飏。未至谁能赋，中干欲病痾。屡曾纡锦绣，勉欲报琼瑶。我恐霜侵鬓，君先绶挂腰。甘心与陈、阮，挥手谢松、乔。锦里差邻接，云台闭寂寥。一川虚月魄，万崦自芝苗。瘴雨沓间急，离魂峡外销。非关无烛夜，其奈落花朝。几处逢鸣珮，何筵不翠翘。蛮僮骑象舞，江市卖鲛绡。南诏知非敌，西山亦屡骄。勿贪佳丽地，不为圣明朝。少减东城饮，时看北斗杓。莫因乖别久，遂逐岁寒凋。盛幕开高宴，将军问故僚。为言公玉季，早日弃渔樵。

南山赵行军新诗盛称游宴之洽因寄一绝

莲幕遥临黑水津，囊鞬无事但寻春。梁王司马非孙武，且免宫中斩美人。



及第东归次灞上却寄同年

芳桂当年各一枝，行期未分压春期。江鱼朔雁长相忆，
秦树嵩云自不知。下苑经过劳想象，东门送饯又差池。霸陵
柳色无离恨，莫枉长条赠所思。

商於新开路

六百商於路，崎岖古共闻。蜂房春欲暮，虎阱日初曛。
路向泉间辨，人从树杪分。更谁开捷径，速拟上青云。

寿安公主出降

姊水闻贞媛，常山索锐师。昔忧迷帝力，今分送王姬。
事等和强虏，恩殊睦本枝。四郊多垒在，此礼恐无时。

寄恼韩同年二首时韩住萧洞

帘外辛夷定已开，开时莫放艳阳回。年华若到经风雨，
便是胡僧话劫灰。

龙山晴雪凤楼霞，洞里迷人有几家？我为伤春心自醉，
不劳君劝石榴花。



哭虔州杨侍郎虞卿

汉网疏仍漏，齐民困未苏。如何大丞相，翻作□刑徒？
中宪方外易，原注：《史记》云：商鞅多左建外易。尹京终就拘。本矜能
弭谤，先议取非辜。巧有凝脂密，功无一柱扶。深知狱吏
贵，几迫季冬诛。叫帝青天阔，辞家白日晡。流亡诚不吊，
神理若为诬。在昔恩知忝，诸生礼秩殊。入韩非剑客，过赵
受钳奴。楚水招魂远，邛山卜宅孤。甘心亲垤蚁，旋踵戮城
狐。原注：是冬舒、李伏粉。阴縻今如此，天灾未可无。莫凭牲玉
请，便望救焦枯。

病中早访招国李十将军遇挈家游曲江

十顷平波溢岸清，病来惟梦此中行。相如未是真消渴，
犹放沱江过锦城。

又 一 首

家近红蕖曲水滨，全家罗袜起秋尘。莫将越客千丝网，
网得西施别赠人。



韩同年新居饯韩西迎家室戏赠

籍籍征西万户侯，新缘贵婿起朱楼。一名我漫居先甲，
千骑君翻在上头。云路招邀回彩凤，天河迢递笑牵牛。
南朝禁脔无人近，瘦尽琼枝咏《四愁》。

西南行却寄相送者

百里阴云覆雪泥，行人只在雪云西。明朝惊破还乡梦，
定是陈仓碧野鸡。

圣女祠

杳霭逢仙迹，苍茫滞客途。何年归碧落，此路向皇都。
消息期青雀，逢迎异紫姑。肠回楚国梦，心断汉宫巫。
从骑裁寒竹，行车荫白榆。星娥一去后，月姊更来无？
寡鹄迷苍壑，羈凰怨翠梧。惟应碧桃下，方朔是狂夫。

自南山北归经分水岭

水急愁无地，山深故有云。那通极目望，又作断肠分。
郑驿来虽及，燕台哭不闻。犹馀遗意在，许刻镇南勋。



行次西郊作一百韵

蛇年建丑月，我自梁还秦。南下大散岭，北济渭之滨。
草木半舒坼，不类冰雪晨。又若夏苦热，焦卷无芳津。高田
长檟枿，下田长荆榛。农具弃道旁，饥牛死空墩。依依过村
落，十室无一存。存者皆面啼，无衣可迎宾。始若畏人问，
及门还具陈：右辅田畴薄，斯民常苦贫。伊昔称乐土，所赖
牧伯仁。官清若冰玉，吏善如六亲。生儿不远征，生女事四
邻。浊酒盈瓦缶，烂谷堆荆囷。健儿庇旁妇，衰翁舐童孙。
况自贞观后，命官多儒臣。例以贤牧伯，征入司陶钧。降及
开元中，奸邪挠经纶。晋公忌此事，多录边将勋。因令猛毅
辈，杂牧升平民。中原遂多故，除授非至尊。或出幸臣辈，
或由帝戚恩。中原困屠解，奴隶厌肥豚。皇子弃不乳，椒房
抱羌浑。重赐竭中国，强兵临北边。控弦二十万，长臂皆如
猿。皇都三千里，来往同雕鹗。五里一换马，十里一开筵。
指顾动白日，暖热回苍旻。公卿辱嘲叱，唾弃如粪丸。大朝
会万方，天子正临轩。彩旂转初旭，玉座当祥烟。金障既特
设，珠帘亦高褰。捋须蹇不顾，坐在御榻前。忤者死跟履，
附之升顶颠。华侈矜递衒，豪俊相并吞。因失生惠养，渐见
征求频。奚寇西北来，挥霍如天翻。是时正忘战，重兵多在
边。列城绕长河，平明插旗幡。但闻虏骑入，不见汉兵屯。
大妇抱儿哭，小妇攀车轡。生小太平年，不识夜闭门。少壮
尽点行，疲老守空村。生分作死誓，挥泪连秋云。廷臣例獐
怯，诸将如羸奔。为贼扫上阳，捉人送潼关。玉辇望南斗，
未知何日旋。诚知开辟久，遘此云雷屯。送者问鼎大，存者
要高官。抢攘互间谍，孰辨枭与鸾。千马无返辔，万车无还

